

INUIT ATAQATIGIIT

INATSISARTUNI



UPA2024/88

Nunarput Folketingimut suli aallartitaqassanersoq pillugu oqallisissiatut siunnersuut

(Inatsisartunut ilaasortaq Pele Broberg, Naleraq)

Inuit Ataqatigiit inuiattut namminiilivinnissarput anguniarparut. Nunatut kiffaanngissuseqartutut nunamik nammineq aqtsinissarput siunertaraarput. Eqqartuussiveqarnikkut, sillimaniarnikkut illersornissatigut, nunatsinni sullivinnik nakkutilliisoqarneq allallu suli oqartussaafffiginngilagut. 1953-imili kunngeqarfiup Danmark-ip tunngaviusumik inatsisaa atuutilermat Savalimmiut peqatigalugu folketingimi ilaasortat 179-iusuni issiaviit sisamat avippagut. Marlunnik tamatta ilaasortaqalerluta.

1979-mi Namminersornerulerpugut suli issiaviit marluk inissaralugit aamma 2009-mi Namminersoq pillugu Inatsit atuutilermat suli issiviit marluk inissarivagut. Naalagaaffiup ataani inisisimanerput ukiuni 71-inngulersuni nikinngilaq.

Inatsisartoqarneq naalakkersuisoqarnerlu 1988-mi avissaartinneratigut Naalakkersuisoqarneq ersarissismangaluartoq suli aaqqissuussaaneq taamaappoq.

Ulluinnarni nunaqarfinni Folketingimi ilaasortaqarnerput malugisanngilara. Paasisimasarparali imaannaanngitsunik suliaqarfiusoq. Ilami nunatsinnit inuit marlunnguullutik inuit paasitinniagassaat 177-iupput.

Toqqisisimanissarput nunaqarfippassuarni pingaartipparput, matumanittaaq kommunefoged-eqarnikkut politeeqarnikkullu suli suliassangaatsiartoqarnera takusinnaavara. Ila danskisut innuttaassuseqartuni tamani inatsisitigut illersungaanerput annikeqaaq.

Tunngaviusumik isummatsinni, uumap oqallisissiap isummerfiginera sioqqullugu nunatut namminiilivikkusuttutut aaqqitassaqartugut isumaqarpunga.

Eqqarsartaatsikkut anersaakkullu annersaanerit tikkuarusuppakka. Oqaaseq “namminiiliiviartuusaartut” atorneqartartoq atuarlugulu tusaasarpa, uffa siunertarput nalunagu- kiffaanngissusermik tamakkiisumik peqarusuttugut. Inuaqatigiit akornatsinni tusangiasaarutinngortoq, uffa tapersersoqatigiittussagaluarluta. Immitsinnut alliseequsorsornermiit ingerlariaqqinniarta, pissutsit atuuttut apeqqusorsorlugit, immitsinnut ataqqilluta.

Taakku taasakka angugutsigit oqaloqatigiinneq atorlugu aaqqisinnaalissaagut.

Siunnersuummut uteqqikkuma Namminersorneq pillugu Inatsip suliarineqarnerani qulakkeerneqarpoq Inatsisartut aamma Naalakkersuisut Inuaat Kalaallit sinnisoringaat- aap tamanna assortunngilarput.

Siunnersuuteqartup aamma eqqaavaa Inuaat akunnerminni isumaqatigiissutit nunatsinnut pineqartillugit Namminersornermi inatsimmi pisussaaffiusoq danskit aamma Kalaallit Nunaanni Naalakkersuisut suleqatigiissasut aap aamma tamanna assortunngilarput.

Siunnersuuteqartup ilanngullugu allassimavaa Folketingimut ilaasortaqarneq puupassaarutaannaasoq, Inuit Ataqatigiinni isumaqarpugut taamatut nalilissallugu ingasanginarsinnaasoq apeqquaatinngu kikkut partiit Folketingimi ilaasortaatiqarnersut. Tamanna paasisinnaavarput. Inatsisartoqarpugut Naalakkersuisoqarlutaku nunatsinnit anguniakkanik siuttusussanik. Aammali apeqquut mumissinnaavarput aperalutalu: nunatsinni anguniakkatsinnik ataqatigiissaarilluarnerusinnaangilagut? Inuit pikkorissut atorlugit nunatsinnut sullisisut atorluarnerullugit?

Taama oqareerlunga nunatsinni naalakkersuinikkut anguniakkagut ersarinnerusariaqarput. Nalorninaallutik, taamaasilluni folketingimi ilaasortanut atorneqarsinnaasunngorlutik. Nalunngilarpummi taakku iluaqutserniarluta sulisartut.

Apeqquteqaammutaaq tunngatillugu oqaatigilara partiit namminneq aalajangersinnammassuk qineqqlusaartitsissanerlutik imaluunniit naamik. Partiit allat qanoq qineqqlusaartitserusunnersut akuleruffigissanngilagut, ataqqivagut.

Isumaqpugulli oqartussaaffiit annertuut, inuit inatsisitigut illersungaanerannut tunngasunik suliassaqartilluta ass. Pinerluttulerimermi inatsit, soorlu upernaaq manna aamma oqaluuserisineqartoq, taava nunarput nukittuumik Kunngeqarfik Danmark-ip tungaanut inissimasariaqarpoq. Inuillu nunarput pillugu anguniagaqarsinnaasut pikkorissut aamma folketingimiittut anguniagaqatigisariaqarpagut. Taakkua aamma ilisimasaqarput, uagut maani ulluinnarsiutiginngisatsinnik. Namminiilivinniartilluta nukiit katersuuttariaqartussaasarpagut.

Siunissamulli eqqarsarlunga, ippasaaninnguaq siullermeerparput Namminersorneq pillugu inatsimmi par. 21-ip atuutsilernissaanut siunnersuut. Tassunga aallareerpugut. Piffissaq aggersoq unitsitassaanani tassunga ingerlavooq, inuiattut kiffaanngissuseqalernissamut. Ingerlavitsinnilu Inuit Ataqatigiinni naatsorsuutiginngilarput folketingimi ilaasortaqartuarnissarput.